

SSM LAKAR SATU LAGI PENCAPAIAN DENGAN PERASMIAN BANGUNAN PEJABAT BAHARU MILIKNYA DI MELAKA

Ayer Keroh, 18 Mac 2023 - Suruhanjaya Syarikat Malaysia (SSM) hari ini melakar satu lagi pencapaian dengan perasmian bangunan pejabat baharu miliknya di negeri Melaka.

Pejabat SSM Negeri Melaka yang baharu beralamat di Jalan Komersial, Taman Kota Fesyen MITC, Ayer Keroh telah dirasmikan oleh YB Datuk Seri Salahuddin Ayub, Menteri Perdagangan Dalam Negeri Dan Kos Sara Hidup (KPDN).

Bangunan pejabat yang berkeluasan 10,395 kaki persegi ini merupakan fasiliti yang dapat menggalakkan lebih ramai usahawan di negeri Melaka mendaftarkan entiti perniagaan mereka di bawah akta yang dikawalselia oleh SSM.

Dalam ucapan perasmiannya, Datuk Seri Salahuddin berkata pembukaan pejabat baharu ini membuktikan bahawa SSM sentiasa peka dan mengambil berat tentang keperluan komuniti perniagaan terutamanya di negeri Melaka.

Beliau juga berharap pihak-pihak yang berkepentingan di Melaka terus berganding bahu bersama SSM untuk menggalakkan komuniti niaga di negeri itu mendaftarkan perniagaan mereka di SSM.

Menurut statistik di negeri Melaka, sehingga 28 Februari 2023, jumlah perniagaan yang berdaftar dengan SSM adalah 317,305 manakala jumlah syarikat yang diperbadankan dengan SSM adalah 29,639. Jumlah perkongsian liabiliti terhad (PLT) yang berdaftar dengan SSM pula adalah 578.

Semasa program berlangsung, SSM menyampaikan agihan Wakalah Zakat Korporat (WZK) SSM berjumlah RM74,000 kepada 24 entiti penerima termasuk peniaga yang terkesan banjir, masjid, surau, pusat tahfiz dan sumbangan Tanggungjawab Sosial Korporat (CSR) SSM berjumlah RM15,000 kepada lima rumah kebajikan. Agihan keseluruhan yang disampaikan berjumlah RM89,000.

Turut hadir pada majlis tersebut adalah YBrs. Tuan Ahmad Sabki Yusof, Pengerusi SSM, YBrs. Dr. Zulqarnain Lukman, Anggota SSM, YBhg. Datuk Nor Azimah Abdul Aziz, Ketua Pegawai Eksekutif SSM, Timbalan-Timbalan Ketua Pegawai Eksekutif SSM dan Pengarah-Pengarah Bahagian dan Negeri KPND serta SSM, wakil badan-badan profesional dan setiausaha-setiausaha syarikat.

Untuk maklumat lanjut, sila hubungi Pusat Panggilan SSM di talian 03-77214000 atau emel kepada enquiry@ssm.com.my.

DIKELUARKAN OLEH: SURUHANJAYA SYARIKAT MALAYSIA
TARIKH: 18 MAC 2022